



12. august 2011

EM 2011/93

Inatsisartut suleriaasianni § 33 malillugu matumuuna aaliangiiffigisassatut siunnersuut imaattoq nassiunneqarpoq:

Inatsisartut aalajangiiffigisassaattut siunnersuut, Naalakkersuisut peqquneqassasut utoqqarnut naleqquttunik marlunnik najugaqarfiliussasut, arfineq-pingasunut inissalimmik Najugaqarfik Elisibannguaq-mut atasussanik. Inissiassat aallartinneqariissapput 2013-imi ukiakkut ataatsimiittoqalersinnagu.

(Inatsisartuni ilaasortat Knud Kristiansen aamma Siverth K. Heilmann, Atassut)

Tunnngavilersuut:

Najugaqarfik Elisibannguaq ulloq unnuarlu najugaqarfiuvoq inersimasunut tarnimikkut ineriartorminni amigaateqartunut naatsorsuussa.

1997-imi aalajangiunneqarpoq utoqqasaat utoqqaallu tarnimikkut ineriartorminni amigaateqartut Najugaqarfik Elisibannguaq-mi inuunermik sinnera najugaqassasut.

Najugaqarfik Elisibannguaq-p initaasa amerlanersaat utoqqasaanut utoqqarnullu tarnimikkut ineriartorminni amigaateqartut pisariaqartitaattut pitsaassuseqaratik. Najugaqarfik Elisibannguaq 2010-mi utoqqarnut naleqquttumik allineqarpoq (satillit), kisianni taanna sisamaannarnik najugaqarfigineqarsinnaavoq. Tamanna ima paasisariaqarpoq najugaqarfiup anguniakkaminik piviusunngortitisisinnaannginneranik, angerlarsimaffimmilu najugaqartut najugaqartiinnarnissaannut.

Tarnimikkut ineriartorminni amigaateqartut amerlanersaat siunissmi utoqqanngorsimassapput, agguaqatigiisillugu ukiut inuffiusartut amerlanerulissammata. Taammammat naatsorasuutigisariasarpoq utoqqaarnut naleqquttunik Najugaqarfik Elisibannguaq-mi inissat pisariaqartitat amigaataalernissaat, massakkullu Najugaqarfik Elisibannguaq-mi taamatut suliaqarnissamut piareersimasoqanngilaq.

Utoqqasaanut utoqqarnullu tarnimikkut ineriartorminni amigaateqartunut periarfissiissagutta massakkut sinaakkutaasut pitsanngorsartariaqarput, najugaqartut utoqqaliartorminni timimikkut aamma innarluuteqalersartut toqqissimanartumik naleqquttumillu najugaqartinniassagutsigit. Ilanngullugu aamma eqqarsaatigisariaqarpoq najugaqartut eqqartorneqartut amerlasuutigut sanngiitsuusarmata, taamaammat najugaqarfiit mikinerusut pilerinarnerullutik. Taamaammat siunnersuutigaarput Najugaqarfik Elisibannguaq allineqassasoq utoqqarnut naleqquttunik marlunnik ilaneqarluni, inunnut arfineq-pingasunut insissaqartitsilluni. Tasamaaliornikkut najugaqarfimmi 29-nut inissaqalissaaq, taaakunangalu aqqaneq-marluk utoqqarnut naleqquttuussallutik.

Aningaasatigut allaffissornikkullu pisortanut kingunissai suuppat?

Siunnersuuteqaratut eqqoriarpaat Najugaqarfik Elisibannguaq utoqqarnut naleqquttunik aqqaneq-marlunnik inigisaliortoqarpat sanaartormi aningaasartuutit 10 millioner koruunit missisliussagaat.

Najugaqarfik allilernerqaruni najugaqarsinnaasut 21-niit 29-nut amerlissapput. Siunnersuuteqartut naatsorsuutigaaat allissutip kingunerissagaa ukiumut 8 millioner koruuninik ingerlatsinermut aningaasartuutit amerleriarnissaat.

Siunnersuutip piviusunngiortinnissaaanut allaffissornikkut sulineq naatsorsuutigineqarpoq årsværkip sisamararterutaanik minnerussasoq, taamaammallu aningaasartuutaarujussuassanani.

Aningaasatigut allaffissornikkullu namminersorlutik inuussutisasarsiuteqartunut kinguissai suuppat?

Inatsisartut aalajangernissaat namminersorlutik inuussutissarsiuteqartunut aningaasatigut allaffissornikkullu kinguneqarnissaa naatsorsuutigineqanngilaq.

Aningaasatigut allaffissornikkullu inunnut ataasiakkaanut kingunissai suuppat?

Inatsisartut aalajangernissaat inunnut ataasiakkaanut aningaasatigut allaffissornikkullu kinguneqarnissaa naatsorsuutigineqanngilaq.